

## Chronik des Vereinsjahres 2023 der Hintere Teil

Am 16. April 2023 ham mia uns zur **Frühjahrsversammlung** im Saal vom Wirt vo Miadakin zammdroffa. Noch da Begrüßung durch unsern Vorstand an Weigl Christian und dem Gedenken unserer Verstorbenen is de Chronik vo da Funk Beawi (ehem. Merk) vorglesn worn.

De Jugendgruppen hod uns schneidig aufdanzt und unser Kassier, da Stacheter Pädal jun. hod den Kassenbericht verlesen und is anschliesend vo de Revisoren und der gesammten Versammlung entlastet worn. Unser Hornfuchs, da Woidleitner Ludwig hod erstmalig den neien, extrig ogschafftn Riahkibe dabei ghabt und Ihn feierlich in unser Gemeinschaft eingeführt. Unser zwoata Vorstand, da Stacheter Max, hod zu Namensatagen, runden Geburtstagen und Hochzeiten gratuliert und mia ham de Michelle Schulze und an Michael Gräf ois neie Mitglieder im Verein begriassn deaffa.

Große Aufsteller über vergangene Gaufeste, de unser Verein ausgericht hod san aufgesteid und herzoagt worn. Ham doch zum Gaufest olle ehemaligen Festvereine sie de Miah gmachd und Fotos und Textstücke aussagsuacht. Mia ham de Ehre ghabt uns mit Erinnerungen vo 5 Gaufesten zu schmücken. (1938, 1966, 1976, 1999, 2004)

Zu den Ehrungen für 25-jährige Mitgliedschaft erwiesen uns d'Waldleitner Kathrin, Rinser Martina, Hiobl Josef, Merk Josef, Siersch Sigi, Riedl Franz und Kellerer Susanne die Ehre.

Für 40 Jahre san am Baumann Josef, Stachelnder Lorenz und Gartmeier-Hoibl Irmengard a Ehrennadel angesteckt worn.

Da Niedermeier Johann und Bachmeier Franz wurden für 50 Jahre Treue zum Verein geehrt. Ihnen zum Dank is as Vereinslied gsunga worn.

Zur Musikalischen Gestaltung vo dem scheena Obnd is da Baumann Anna, am Ludwig Waldleitner und am Georg Gartmeier a Dankscheen zum song.

Trotz schlechtem Wetter ham sich wieder fui Trachtler vo da 18-ner Gemeinschaft betend zum **Bartholomäuskircherl noch Kloahearoa** aufgmachd. De Mess hod da Pater Banda ghoidn. Vielen Dank de Heharoana fias alljährliche ausrichten.

Am 29. April hod si unser Aktives Paar, da **Bernhard und de Franziska Weichinger**, in da Maria Himmelfahrtskirche as Ja-Wort gem. De weltliche Feier hod beim Wirt in Miadakin stattgfundn und es war a sau scheena Dog wo da Verein eiglon war, a Ehrdanz und a Gratulation vom Verein ausgsprocha worn is. Mia wünschen Eich mid eire Kinder olles erdenklich Guade fia eicha gemeinsames Lem und dass weiterhin so fui Freid am Dabei-sei bei unserm Verein habz.

Maibaumaufstellen in Ellmosen am 30.4. Oan Dog vorm 1. Mai is in **Ellmosen da Maibam** aufgteid worn. Dreder Musi hod fia de fuin Leid aufgspuid de kemma san an dem scheena warma Frühlingdog und unsere Kindergruppen ham zoagt wos sie kennan und san auftreten bis olle midnand de Bayernhymne gsunga ham unter unserem Himmel weiss und blau.

Anfang Mai war de Hochzeit vom **Karl Andreas und seiner Lisa** bei dera unsere Aktiven an Ehrdanz gmachd ham. Mia wünschen Eich fui Glück und Segen und olles woss eich wünschz.

Am dritten Freitag im Mai war in der Pfarrkirche unser **Maiandacht**, de de Spitzl Johanna organisiert und mit passenden Texten geschmückt hod. De Voggenauer Marina, de Wittmann Franziska, de Weigl Sophia und de Gartmeier Anna ham uns ois Flötenquartett aufgspuid, wos de Resch Anna mid eana eistudiert hod. De Weigl Theresa und da Simon ham aufgspuid und da Kinderchor unter da Leitung vo da Nitsch Christina hod gsunga. Da Stefan und da Valentin Strauß, und da Resch Martin an da Orgel ham des vielseitige musikalische Programm no abgerundet. Vielen dank fia olle Miah und schee wenn sie so fui Zeit nehman unsere Traditionen zu umrahmen.

### *Jahr 2023 – Fortsetzung*

Am 21. Mai 2023 war as **75-Jährige Vereinsjubiläum in Kirchdorf**. Es war a sehr heisser aber scheena Dog bei dem unser Verein dabei sei hod deaffa, obwoi koana so recht gmoand hod, dass Kirchdorf doch so groß is, weil ma doch a Eck ganga san. Der schattige Kirchplatz war schee jedoch is koana so lang bliem weil as Schwimmbod bei dene Temperaturen a sehr verlockend war.

Am ersten Freitag vom Oablinger **Volksfest** war wia immer da Festzug durch Oabling wo unsere

Junga und jung gebliebenen Burschen unsern Verein repräsentiert ham. Mit am Guadn Essn und na scheena Musi hods unser Volksfest würdig eingeleitet.

Unser Bruder-und Nachbarverein de **Oberlandler ham 130 Jahre** Vereinsgründung feiern deaffa. Am 2. Juni is vom Willinger Gmoahaus a Kirchazug Richtung Mitterham ganga wo de Feldmesse beim Krimplstätter Sepp war. Im Innenhof vom Gmoahof war des Fest, wo de Willinger Musi aufgspsuid hod und mia Edelweißer an Ehrdanz aufgeführt ham. 2 Patenvereine und mia ham mid de Willinger no ausgiebig feiern deaffa und unser Hornfuchs, da Ludwig, hod a große Ehr und Bewunderung mid unserm neien Riahkibe aufhebt.

In da Zeidung vom 4. Juni is ganzg geheim as Geheimtraining vo de Verheirateten **Fußballer** fia Fronleichnam bekannt gem worn. Voi Geheim!

Unser Mitglied die **Anna Gigl** is am 5. Juni von uns gegangen. Mia danken fia de Treue zum Verein und wünschen dir ewgigen Frieden im Himme drom.

Noch verrenge Frühlingswochen waren olle froh, dass an **Fronleichnam** a scheens Wetter unsern Gang zum Brunnenhof begleitet hod, wo in altbekannterweise de heilige Messe stattgfundn hod. Unser Stadtpfarrer Herr Georg Neumaier hod diese zum letzten moi ghoidn. Hod er doch im seiben Monat sein 70. Geburtstag feiern deaffa und sich seinem wohlverdienten Ruhestand genähert. Wie immer is da Altardienst auf der Bühne, jedoch de Gemeinde heuer in am neuen Zelt vor da Muschelempore gstandn. Lektoren, Kommunionhelfer und Spendensammler warn mit vo unerem Verein dabei. Die Prozession, in der mia das Allerheiligste durch de Straßen vo unserm scheena Oabling drong, hod an Altar am Marienplatz und den Abschluss in da Maria Himmelfahrtskirche gfundn. Anschließend ham ma uns zum Weisswurschtfrühstück beim Biergarten vom Hotel Johannisbad eingefunden. Danoch war des traditionelle Fußballspiel im Jahnstadion, wo Verheirate und Ledige a Kopf an Kopf Rennen stattfand, des de Verheirateten mid 2 zu 1 für sich entschieden ham. Sehr gemütlich is a superscheena Nammedog zu Ende ganga, der midn Hubert seim Most, dem oan oder anderen Bierchen, Kaffe und Kuacha, Eis fia de Kinder und Eiskaffe fia de großen Schleckermäuler ausgeklungen is.

Am 15.06.23 hod uns ein schwerer und unvorstellbarer Verlust ereilt, ois unser **Sybille Heinisch** von Ihrem Erdenleben viel zu jung geschieden worden is. Sehr freundlich, stets lustig, bei da Faschingshochzeit und am Vereinsausflug aktiv, vermissen mia Sie, wünschen ihra Familie vui Kraft und wern in dankbarer Erinnerung sei, so an liabn Menschen in unserer Gemeinschaft ghabt zum hom. Vui Trachtler ham ham sich zur Trauerfeier eigfundn um die liebe Sybille auf Ihrem letzten Erdenweg zu begleiten. Es hod so vui grengt, wia Bäche aus Tränen des Himmels. Mia wünschen da ganzen Familie vui Kraft in dera unwirklich schiachn Zeit.

Der darauffolgende **Vereinsabend** is klein abgehalten worn weil man nimma ganz obsong hod kenna. Es war eher a beinanda und midnandasei. fassungslos.

Am 24. Juni hod unser ehemalige Jugendleiterin, de **Weigl Steffi, ihran Gräf Michi** gheirat. Es war a wunderscheena Dog den mia ois Trachtler mid begleiten ham deaffa, geehrt durch an Ehrdanz und a Geschenk. Mia wünschen eich mid eicham kloana Lukas dass unser liaba Herrgott immer sei schützende Hand über eich hoidn mog.

Beim **Irlachweiherfest** am 30. Juni finden jedes Jahr no mehra Leid an den scheena Plotz am Weiher im Kurpark. De Positionierung vo da Bühne und da Schank war heia anders, dass ma mehra Garnituren aufstein hod kinna, und doch hams ned glangt und mia ham nummoi nochrüsten miassn. As Wetter war herrlich und unsere und de Kinder und Jugendgruppen vo de Oberlandler san bis umra 8e aufdnochd auftreten. Danoch hod de Drillinger Musi no fleissig aufgspsuid und de Gäste ham danzt wie da Lump am Steck. Vielen Dank olle helfenden Hände und stolz kenn ma sei auf so a guade Zusammenarbeit mit de Oberlandla weils wieder so a scheens Fest war.

*Jahr 2023 – Fortsetzung*

De **Pfaffenhofener ham beim Gauheimatabend** vorm Gaufest mid starke Kinder und



Spalier steh zur weltlichen Feier in Ostermünchen beim Landgasthof Wallner eiglon warn. Bei dem so scheena Dog im Spätsommer ham unsere Aktiven an Sterndanz zu Ehren des Brautpaares aufgeführt. Mia wünschen Eich und eira Familie nur as Beste fia eicha gemeinsame Zukunft und dass eicha Liebe oiwei fest in eire Herzen is.

De **Herl Leni war heia auf da Oim**, do is Sie unseren Aktiven doch recht obganga übern Sommer. Sie ham midnand an Ausflug do hi gmachd wos a rechte Gaude war.

Am 24.9. war da **Trachtenjahrtag** vo uns Edelweißer und de Oberlandler Trachtler. De Willinger Musi hod uns aufgpuid und nochn Umzug und da Kirch is Middog beim Wirt in Miadakin eikehrt worn, wo uns de Willinger Musi no schee aufgpuid hod.

Ihran 85. Geburtstag hod unser Ehrenmitglied, de **Niedermeier Leni** am 28. September 2023 feiern deaffa. Mia warn mid am Geschenkkorb zum Gratulieren bei ihr und wünschen olles Guade zu deem Jubeltag! Es war so scheens Wetter und die ganze Familie is ins Vereinsliad eigstimmt. A richtiger Geburtstagschor!

Am 1. Oktober hod a **Vereinsabend** in kleinerer Runde in da Weinstumm stattfundn. Mia ham ganz herzlich a neis Mitglied, an Florian Gottschall in unsern Verein aufnehma deaffa, und noch da Reih ham de Ziachara Burschn vo unserer Aktiven aufgpuid.

Es war wieder soweit, unser **Vereinsausflug** is do. Unser Moni hod wieder a tolles Programm zammgsteid. Da Beginn war de Benediktiner Abtei in Rohr. Auf der Fahrt hod de Aktive olle mid Kuacha, Kaffe, Brezen und Sekt versorgt, olle ham den Hundertwasserturm in Abendsberg bestaunt und sich de 5 Weissbiersorten beim Kuchlbauer noch na Brauereiführung schmecka lossn. Wos am viel beklatschtem Marschplatter draufganga is. De Aktiven ham heia a Reisevergünstigung griagt. A Herzlichs Vergelts Gott.

Während der Fahrt durch de Hopfafelder der Holledau is fui gsunga und Musi gmachd worn im Bus. Bei unserm Wirt des Abends war a Hochzeit, wo wir kurzzeitig gmoand ham unser Aufwartung durch an Ehrtanz macha zum kenna. Des hod allerdings da Wirt verhindert und a Musiverbot ausgesprochen. Kurzerhand an Marschplattler auf da Strass is a neie Wirtschaft gfundn worn und es war a lustiger Obend mid vui Spiele und Danzn und Musi.

Am naxtn Morgen war um 10e Kirch und danoch ham ma a berühmte Holledauer Talbrücke und Hopfenfelder besichtigt.

Bei der Heimfahrt war die diesjährige Schätzfrage "wie viele –E's- tragen alle Namen der Reisegruppe zamm in eanane Nama" ? Da Georg und de Paula Baumann ham gwunna, Sie ham 66 gschätzt und es warn 64.

Herzlichen Dank an die Stacheders für's organisieren, unseren Musikanten, den Busfahrer Peter und dem Thomas Janschek fia de Führung ! Es war echt a super schöner Ausflug !

Es is sehr zu empfehlen auf unser **neie Website** zum schaun und den ganzen Bericht zum lesen. Es is einiges zum Schmunzeln dabei, wos in meim Bericht heid leider koan Platz gfundn hod. De neie Website hod da Gartmeier Lorenz erstellt. Do dafia mecht ma a herzlichs Dankscheen song. Da Höbel Franz hod de erste Website 2004 ins Leben gerufen und 2016 hods nummoi a gressane Umstellung gem. Dia Franz an überaus großen Dank fia de vuie Zeit und Geduld, de du in unsern Online Auftritt gsteckt host! (Applaus!). Es is no ned ausmachd wer de Website in Zukunft betreut. Olle Beteiligten auf jeden Foi a großes Vergelts Gott!

An dem gleichen Wochenende war de **Landesversammlung des Bayrischen Trachtenverbandes**. In Oberaudorf hod heia da Inngau da Gastgeber sei deaffa. Am Samstag war da Gremiumtag, wo sie olle Ausschüsse troffa ham. Am Abend war großer Festabend, wo sich unser Gau vo da besten Seite gezeigt hod. Ham si doch a Theaterstickl aufgeführt vom Leben eines Trachtlers im Gau vo da Geburt bis zum Doad. Vo uns warn a einige dabei, ned nur am Festabend sondern a vorher scho beim heiffa. Es war a große Ehre fia unsern Gau und a hervorragende Representation.

*Jahr 2023 – Fortsetzung*

Am 22. Oktober 2023 war nach langem moi wieder a **Vereinspreisplatteln**. Olle ham fest geübt und

so san fia de Große Kindergruppe 3 Buam und 6 Dirndl, in da Jugendgruppn 5 Buam und 5 Dirndl und bei de Aktiven 13 Buam und 16 Dirndl otreten. A vo de Altaktiven ham 6 Leid middo. De drei Besten vo de Aktiven Buam warn da Gartmeier Georg, da Nitsch Kilian und da Halbig Marinus, und bei de Dirndl de Gartmeier Kathi, de Hartmann Bernadette und de Weigl Elisabeth. Großer Respekt an olle de middo ham, ham sie doch fias Dabei sei a Abzeichen vo unserm Verein griagt. Schee wenn ma midnand ois Verein a so an scheena Dog ghabt ham.

Unser **Sebastiani Kirch** im Herzen vo Oabling wird grad renoviert. As Wetter war im Frühjahr nass aber der Sommer war so warm und schee wie selten. Da Oktober war da 2. wärmste seit Beginn der Wetteraufzeichnungen.

Jez hob i über oide Bauernregeln glesn, um an sinnigen Abschluss fia des warme Wetter zum findn. I bin drauf kemma das mia so dankbar sei kinnan, do im Paradies zum lem wo ma si sicher fühlen kann wenn ma aufdnochd eischlafnd und in da friah aufsteht und oan NUR beschäftigt weicha boarischs Sprichal as Wetter erklären kunnt. Es is so vui Unruah und Unrecht auf dera Welt. In da Ukraine is koa End in Sicht mit Kriag und mit Israel und Palestina... i kann mi fia koa Seiten aussprecha, des mog vielleicht jeder a bissl anders seing, aber schod iss, dass so vui Hass in de Herzen is. Und beten kenn ma blos, das boid Frieden eikehrt auf da Welt und dass mia oiwei gspiahn deaffan, wie schee dass mas ham.

Gschriem in de ersten koidn Oktoberdog, da Wendelstoa war scho a bissl weiß.

Vo da Funk Beawi

Chronik des Vereinsjahres 2023 2024 der Vordere Teil

Am 5. November 2023 war de alljährliche **Jahreshauptversammlung** vo uns Edelweißer beim Wirt in Miadakin. Noch der Begrüßung durch unsern ersten Vorstand Christian Weigl is unserer Verstorbenen (Michael Karl, Jakob Hartmann, Fritz Gerlmaier, Biwa Stockinger, Anna Gigl, Sybille Heinisch) gedacht worn und die Chronik von da Beawi Funk - krankheitsbedingt von ihra Schwester, da Rosalie Merk, verlesen worn.

Unser 2. Vorstand, da Stacheder Max hod alle Namenstagskinder gratuliert und da Johanna und am Thomas Spitzl zu eanam zwoatn Buam, am Ludwig, gratuliert. Herzlichen Glückwunsch! Da Stacheder Peterl hod an Kassenbericht verlesen. Entlastung folgt bei da Frühjahrsversammlung. Von der Jugend hod de Stockinger Franziska, ois Jugendleiterin verlesen, dass de kloane Kindergruppe vo 2021 mid 15 Paar, de Gruppe vo 2018 mid 12 Paar und de 2015ner Gruppe mid 7 Paar vertreten is. Vo Ausflüge, na gemeinsamen Plattlerprob mid de Ostermünchner und Schenauer Trachtler und vo da Jugendleiterversammlung hod sie berichtet. Zu aller Freude wird im Jahr 2024 a neie Kindergruppen ins Leben gerufen.

Der Bericht Unserer Zeugwartin, da Merk Beawe hod zu Staunen gem, wie sie de 180 bis 200 eigewandten Kinder und Jugendlichen bis 27 Jahr in unserm Verein erwähnt hod. Mieder-Infotag Haaarsteckkurs, Nähabend fian Verein und den Kauf vo am neien Stoff fia unsere Kittel is verzeid worn. Da Weigl Gitti und Beawi, da Rosalie Merk und da Baumann Magdalena is fias Heifa bei de Tauschtage gedankt worn.

Da Bericht vo Unserm Hornfuchs, an Ludwig Waidleitner, hod auf de Frühjahrsversammlung verschom wern miassn weil er si bei am Feuerwehreinsetz an Arm brocha hod und ned do sei hod kinna. Sein Part fia de flüssige Versorgung unserer Mitglieder hod da Matschgo Beni übernomma. Da Bericht vom Gartmeier Georg ois Vorplattler über unsere 30 Aktiven vielen Hochzeitseinsätzen, des Midfahrn zur greana Woch mid de 18-er und vo 19 große Termine verzeid. A as Vereinspreisplatteln mid 53 Teilnehmer und as Gaupreisplatteln san beleuchtet worn.

De Aktiven ham plattlt und dantz fia olle und da Baumann Schorsch hod abwechselnd mim Gartmeier Georg und am Martin Beni aufgspuid.

Ois letztes is da Bericht vom Vorstand mid na Darstellung über de Vorbereitungen fia an neia Bon im Vereinsheim kemma, und de Terminvorschau sowie Wünsche und Anträge. Dabei is a Spülküche, Frauenanteile beim Volksfestaufmarsch besprochen worn sowie de Belohnung fia de Aktiven vom Stacheder Bäda und am Weigl Hubert verkündet worn, dass Sie a Banze Bier griang

wenn mid 12 Baar an da Frühjahrsversammlung auftrett wird. Es war a musikalisch griabiga Ratsch- Ausklang.

### *Jahr 2023 – Fortsetzung*

Da Baumann Schorsch war an da **Musikwarteversammlung** am 15.11.2023, des im Zentrum für Volksmusik, Literatur und Populärmusik in Bruckmüh stattfundn hod.

Am **Volkstrauertrag** den 19.11.2023 war Uuser Fahnenabordnung mit dabei.

Den **Abschlussgottesdienst** vo unsere Plattlakinder hod de Resch Anna am 29.11.2023 in Miadakin gestaltet. Ihra Bruada Martin hod Orgel gspuid, und sie und de Veronika und de Johanna und Elisabeth Nitsch ham midnand gsunga. Vielen Dank!

As **Adventssingen** (am 10.12.2023) is heia wieder im Kurhaus von Trachtler vo uns und vo Osterminga unter da Leitung vo da Merk Beawi aufgeführt worn.

Oa Szene ham de Hirtakinder a an unserer **Weihnachtsfeier** am 16.12.2023 aufgeführt, beim großen Saal beim Kriechbaumer Wirt in Miadakin.

Da staade Teil is vo 4 Sänger, am Resch Martin, am Weigl Christian, da Martin Franziska und da Merk Rosalie gestaltet worn. Sie san vo da Mark Franziska an da Harfen begleitet worn. Da Kinderchor, den de Strauß Marianne mit Gitarre und Gesangg unterstützt hod, und a Klarinettenmusi mim Merk Roland, da Beawi am Halbig Marinus und am Strauß Stefan jun. ham den Abend bereichert. Besinnliche Weihnachtsgeschichten san vo da Funk Beawi vorglesn worn, und an Dank da Spitzl Johanna fias organisieren.

Da Besuch vom Nikolaus, den da Gartmeier Xav fia uns gmachd hod, is a oiwei a scheena Programmpunkt an dem Obnd. San doch seine Verserl und Gschichten vom ganzen Jahr oiwei berig gedichtet und zum Schmunzeln und Lacha prädestiniert. Beim Theaterstück: „do legst di nieder“ hod wieder de Baumann Paula Regie geführt. Da Strauß Stefan jun., da Baumann Georg, de Maier Marina und de Baumann Marianne ham ois gem und de gekonnte Inszinierung hod Urlaubs- und Bettgeschichten vo so mancher Leid verzeid. Danke da Moni fia den Dienst im Hintergrund ois Souffloese. De abschließende Tombola hod viele große und kleine Augen leuchten lossn. Vielen Dank fia olle de Spenden geben und de, de olles so guad hergricht ham, fia de Mitwirkenden vom staaden Teil, de Theaterspieler und unsern liabn guadn Nikolaus. Es war a voller Saal und es hod gwurled und war so lebendig vo oid bis jung. Es war a richtig berige Weihnachtsfeier!

### *Jahr 2024*

Am 9.1.2024 is unser Mitglied, de **Gerlinde Gärtner**, von uns gegangen. Schod dass du so friah geh hosd miassn. Mia wünschen dir dein ewigen Frieden im Himme drom.

**Gau Vorständebesprechung** war am 20.1.2024 in Holzhausen. Unser Christian war dort und es is über die Verbandsbeiträge diskutiert worn und as Trachtenkulturzentrum ogschaud worn.

Am 28.1.2024 is unser Jugendgruppe vo da Stockinger Franziska, am Gartmeier Flock, am Stacheder Bädal und da Schmid Theresa zum **Gaujugendanz** gefahrn. Schee wenn Sie de Junga unteranand im Gau scho kennanlernan, danzn und feiern sie doch hoffentlich a lange Zeit in eanam Lem midnand.

**Stammtisch der 18er Trachtenvereinigung** vom Altlandkreis war bei uns, beim Wirt in Miadakin. Es war a nette Rundn und is a guade Sach fias Midanand, wo ma si über jeden gfreid der kimmt.

De **Sophia und da Wolfgang Wiedhammer** ham an Adam und de **Spitzl Johanna und ihra Thomas** ham an kloana Ludwig griagt. Herzlichen Glückwunsch eich!

Am 11. Februar war Unser **Faschingszug** in Oabling und de Dreder Musi is uns wieder, gleich eingewandet, vorausganga. As Thema war Zirkus und olle ham si eineghengt, so dass hoassn hod kinna: Manege frei! De Edelweißer kemman! Jahrelang hod de Merk Beawi as Thema ausgedacht und hod si mid de Kinder getroffen und den Marsch übernommen, wonoch de Halbig Hedwig dann

olle mid Krapfen versorgt hod. De Nitsch Christina hod si netterweise bereit erklärt des Amt vo da Beawe zu übernehmen. Vielen Dank!

Zur **18-er Versammlung** am 19.2.2024 san da Christian und de Merk Beawe noch Kloahelferdorf gfaahrn. Es hod an interessanten Vortrag vo da Erika Spohn vom Kreisjugendring über Geschichte, Tätigkeit und Zuschussmöglichkeiten gem. Da Vorstand vo de Westerhammer Trachtler hod uns auf eana Gaufest vom Gauverband I mid olle Vereine vo da 18ner Vereinigung eiglon. Wia de Frage aufkemma is, ob sa sie des a no aufdoa meng, weil sie ja scho so fui san hod er gmoand, dass bei 10.000 a nimma drauf zamm kimmt und sie uns gern dabei ham! Des is doch a scheene Sach und kenn ma uns scho gfrein.

Am 25.2.2024 war **Vereinsabend** mit eigens erstelltem Bayernrätsel vo unserm Matschgo in da Weinstum beim Wirt in Miadakin. Heia iss uns Bier ganga und noch tollen Preisen und Ehre wem Ehre gebührt ham mia no zwoa Neuaufnahmen ghabt. Da Valentin Strauß und da Korbinian Voggenauer san jetzt Mitglieder und mia gfrein uns eich im Verein begriassn zum deaffa, seids es doch scho lang bei unsere Plattler dabei und jetzt bei Aktiven fleissig am Platteln.

Zur großen Feier, dass as **Irlachweiherfest** wieder so berig highaud hod, ham si olle Helfer am 15.3. zur **Nachfeier** mit de Oberlandler droffa. Auf dass oiwei so a guads Midaranand bleibt.

Weil koana vo de Vereine an ganzen Bus foibrochd hod, san mia Edelweißer midnand mid de Schenauer und de Ostermünchner ins **Trachteninformationszentrum** noch Holzhausen bei Landshut gfaahrn. Es war a lehrreiche und abwechslungsreiche Tagesfahrt. De neie Ausstellung über Trachten is ogschaud worn, und Einblicke über die finanziellen Aufwand fia de Projekte is vom Wolfgang Gensberger bei na Führung erzeid worn. In der Ausstellung war a a Damenhuat aus Oabling dabei, der vo um 1800 stammt. Unsere Hiad ham domois no ganz anders ausgschaud. Groß mit zwoa Quasten an da Seiten. Berig eigentlich, und schee, dass vo uns a a Beitrag dabei is. vom kurzweiligen Ausflug und was in den letzten 20 jahren entstanden ist.

Ende März war wieder **Osterkerzenbasteln** mid da Hildegard, und da Johanna Weigl und da Bossmann Edith. Vielen Dank dass es den Brauch aufrecht erhoids und mid unsere Kinder de Tradition lebz und bastelts, dass de Kerzen an Ostern fia de Familien leichtn kinnan.

Am 2.4.2024 hod de **Martina Zweckstätter** zu unserm Herrgott hoamkemma deaffa. Der Herr gib Ihr die ewige Ruhe.

### *Jahr 2024 – Fortsetzung*

Anfang April is **Trachtenwartinnenversammlung** in Nussdorf gwen, wo si de Beawe und de Rosalie Merk aufgmachd ham unsern Verein zu vertreten.

In da zwoaten Aprilwoch ham sich um de 30 Damen an zwoa Aufdnochd mid da Merk Beawe im FLoriheim versammelt und midnand **Unterröcke, Spitzenhosen, rote Röcke** und Dirndl -und Buamaschmieße gnaht. Vielen Dank olle fias Heiffa, dass unsere Jüngsten sauba daherkemma kinnan, wenn ma mim Verein aufmarschieren.

Heid, am 13. April war **Kleidertausch** fia de Jugendgruppen. Es is vo da Merk Beawe und da Rosalie Bestandsaufnahme gmachd worn, bei weicham Dirndl no wos feid, dass de neien Vorbereitungen starten kinnan, unser Jugenddirndl ins Miada zum gwandn.

Schee das heid so a scheena Dog is, war der April doch eh so warm wia selten. Und dass mia heid beinand sei kinna, gfreid mi narresch.

San ma froh um den Frieden den ma ham deaffan auf unserm scheena Fleckerl Erden.

Fertiggschriem am 13. April 2024 barfuass bei Sonnenschein.

Vo da Beawi Funk

*Ende*